



Dulcamara (Armin Caduff, seniester) venda igl elixier d'amur a Nemorino (Mihajlo Arsenski). L'amur stat el center dalla cumedia da Gaetano Donizetti presentada a Sursaiassa.



Gion Gieri Tuor (dretg el stgir) dirigia igl orchester dalla Ungaria.

FOTOS G. VENZIN

Il plascher d'amur sederasa

■ (gv) La Compagnia Rossini, il Coro Opera Viva ed igl Orchester Giuseppe Verdi dattan damaun premiera dalla opera «l'elisir d'amore» a Sursaiassa. L'opera cumponida da Gaetano Donizetti e premaudida avon 176 onns ei ina opera fetg enconuschenta e savens presentada. Ella sedifferenziescha el cuntegn dil tuttafatg dallas duas presentaziuns dalla Opera Viva Sursaiassa dils dus davos onns. Ton «I Lombardi» da Giuseppe Verdi sco «Moses» da Gioacchino Rossini ein stadas duas operas dramaticas. «Igl elixier d'amur» ei ina cumedia d'amur cun in «happy end». En in vitget muntagnard el nord dall'Italia spetgan ils purs la viseta dil miedi Dulcamara (Armin Caduff). El venda buca mo medischina per tuttas malsognas, el venda era igl elixier d'amur. Il medem mument ch'il miedi fa viseta arriva era ina truppa schuldada nunspitgadamein el vitget ed il sergent Belcore (Flurin Caduff) garegia Adina (Anica Defuns), ina dallas treis soras ustieras. Era Nemorino (Mihajlo Arsenski) ei inamurau en Adina, mo quella sehana nuot dad el. Dulcamare venda igl elixier d'amur a Nemorino, mo igl elixier en fuorma da vin fa buca mo bein agl inamurau. El vitget va tut crusch e traviars.

Tier la tiarza ediziun dalla Opera Viva sa il menader artistic Armin Caduff sefidar d'artists indigens cumprovai. El hagi era tschercau ina ovra che mondi a prau cul chor, culs solists e cugl orche-

ster. Ils solists da «l'elisir d'amore» ein ils medems sco ils davos dus onns. La rolla da Nemorino ha Mihajlo Arsenski dalla Macedonia in siu repertori, quella rolla ha el gia giugau e cantau alla opera nazionala Opéra Bastille a Paris.

Armin Caduff sefida denton en emprema lingia sin artists indigens. Muort quella tenuta ha in bi diember da cantaduras e cantadurs sursilvans giu la pusseivladad da sededicar al cant sin ault nivel. Anica Defuns, Maria Catrina Caduff, Cornelia Cathomen e Flurin Caduff ein sper il maestro Armin Caduff ils solists dalla nova opera. Il Coro Opera Viva ha ella nova produczion ina rolla meins pretensiusa ch'ellas operas presentadas ils dus onns vargai.

Igl «Orchester Giuseppe Verdi» ei in delegt per sesez. Avon quater onns ha il dirigent Gion Gieri Tuor fundau igl orchester ensemen cun siu amitg Miklós Wrcchovsky dalla Opera nazionala da Budapest. Igl orchester secumpona da musicists dall'entira Ungaria. Quei orchester ha dau la premiera avon treis onns a Sursaiassa.

Artists indigens ein era responsabels per la cumparsa dils artists e dalla tribuna. Rudolf Mirer ha seschau inspirar dalla cumedia e malegiau in maletg da rundund 100 meters lunghesia. Claudia Desax da Dardin ei responsabla per la tecnica da tribuna e Sylvie Capeder da Paris/Glion ha creau e procurau pils costumes.



Il sergent Belcore e Nemorino garegian la biala Adina (Anica Defuns).



Belcore (Flurin Caduff, seniester) viseta il vitget muntagnard culla truppa schuldada.



Maria Catrina Caduff (enamiez) ha terminau avon dus onns il studi da scolasta secunda e sededicheschia cumpleinamain alla carriera da cantadura. Ella conta la rolla da Gianetta.